

# De unha beira a outra

O QU'E NECESARIO

(Especial para CELTIGA)

Unha nova constitución do Estado hespañol anda a s'elaborare. Do qu'ela será soio se teñen referencias esvaídas, novas pouco craras. Mais ainda eisi, tendo en conta a cras d'elementos que no novo estatuto poñen ás suas mans, os seus denantececedentes, a sua historia pública, ven se pode colexire, sen temor a que os feitos teñan de rectificarnos, que a obra en execución non será, nin con moito, o que as apremiantes realidades naturaes recraman. E por iso ben pode afirmarse que, unha vegada más, a Hespáña seguirá sen abranguer o estatuto básico e fundamental, tal como os feitos recraman, que se fai indispensabel pra que o erguemento do Estado hespañol se troque en algo efectivo e tanxible, deixando de serre o que até o de agora foi, púras semellas apenas afincadas en sólido basamento.

Pra que a Hespáña — e ao dixere a Hespáña referímonos ás diversas nazonalidades que a integran — poida escomenzar a soñar na realización do troque salvador e magno que terá de convertila na Iberia — o arelado degairo de todolos que nos chamos nazonalistas — fáise perciso que, denantes de nada, nela xurda un ideal colectivo, de solidaridade íntima, fonda, de verdadeira i-estreita solidaridade racial, non soio ante todolos pobos que a compoñen, sinón tamén con aquel gran pobo irmán que a cegueira dos gobernantes inaxeitados pra empresas un pouco outas e fallos pol-o mesmo de luces pra seguir unha política que non fose esnaquizada e assimilista, fixo trocarse en arredado i-eistranxeiro. Non é mester decir que nos referimos ao Portugal.

Mais pra que iso sexa doado e realizabel, cō que os degoiros, nobres de todolos penínsulares erguellos, que foron e son, virían a se realizaren, perciso é que o país irmán, a nobre Lusitania, da que o nosso bardo Pondal sempre falou con verbas de agramo fraterno e como de presentimento, olle realizadas dentro do Estado hespañol aquelas transformacións e reformas radicaes e apremiantes, por tanto tempo negadas polos funestos dirixentes dos

destinos públicos con unha contumacia cuias consecuencias foron decote ben lamentábeis.

Se fai perciso que, contrariamente ao que agora sucede, o Estado sexa a verdadeira representación de unha comunidade ampla e magna de intreses conciliados, de afectos espontaneamente creados e polo mesmo verdadeiros, de unha convivenza fraternal de pobos diversos que tendo necesidades, sentimientos e modalidades diferentes, teñan tamén, emporiso, un denominador común que os axunte, os ligue e os manteña firmes en voluntaria unión, converxindo en algo indisoluble e, polo mesmo, resistente a todas as conmociones e a todas as continxencias. Non, como ven sucedendo actualmente, que o Estado apareza convertido na eisclusiva representación de un pobo — xa sabedes cal é — pouco predisposto a tratarse como igual cōs de mais que con él constituíen e forman a comunidade ou orgaización estatal.

A obra a emprendere, pois, i-eisi o enxerguemos os nazonalistas das diversas nazonalidades penínsulares, é unha obra de igualación de dereitos bulrados ou negados, de recoñecimento de prerrogativas e facultades esquecidas ou estorbadas. E, en suma, fundar, asentar a constitución hespañola no máisimo e ausoluto respeto á igualdade de dereito de todolos pobos que compoñen a Hespáña, sen preferencias nem privilegios pra ningun. I-eisi, de tal xeito, unha vegada consolidada a obra, poderán chegare aqueles ditosos tempos, tempos de rectificación de erros anteriores e de propósitos recusadores do pasado, en que os irmans portugueses, ollando como na Hespáña os pobos que a compoñen gozan de prena e ausoluta libertade sen teren pra elo que sacrificaren ningunha das características que son esenciais ás nazonalidades, decidan a sua incorporación á tal xuntanza de pobos ceibes e soberans, dando eisi efectividade a xúrdia e trascendental arela que se chama a Iberia grande.

Ramón VILLAR PONTE



Para asegurar una renta ampliamente garantida, adquiéranse

## BONOS HIPOTECARIOS

DEL

BANCO DE LA PROVINCIA DE BUENOS AIRES

**6 % de interés anual y 1 % de amortización anual**

Casa Matriz: La Plata

Av. Ing. Luis Monteverde 726

Casa Central: Buenos Aires

Calle San Martín 137 y Bv. Mitre 451-457